


O'zbekiston va Janubiy Koreya munosabatlari alohida strategik sheriklik darajasiga ko'tarildi



O'zbekiston Respublikasi Prezidenti Shavkat Mirziyoevning taklifiga binoan Koreya Respublikasi Prezidenti Mun Chje In 18-aprel kuni davlat tashrifi bilan mamlakatimizga keldi.

O'zbekiston bilan Janubiy Koreya geografik jihatdan bir-biridan uzoq, lekin ko'ngli yaqin, tinchlik va taraqqiyot yo'lida maqsadi mushtarak davlatlardir. Tarixdan ma'lumki, mamlakatlarimiz Buyuk ipak yo'li davrlaridan boshlab o'zaro bordi-keldi qilgan. Samarqanddagi "Afrosiyob" muzeyida saqlanayotgan devoriy suratlarda VII asr o'rtalarida Samarqand hukmdorining qadimgi Koreya – Choson elchisini qabul qilish marosimi aks ettirilgani bunga yorqin misol bo'la oladi.

Mamlakatlarimiz vaqt sinovidan o'tgan ishonchli strategik sheriklardir. Oliy darajadagi muloqotlar va mushtarak intilishlar samarasida mamlakatlarimiz hamkorligi barcha yo'nalishlarda izchil rivojlanmoqda. O'zbekiston Respublikasi Prezidenti Shavkat Mirziyoevning 2017-yil 22-25-noyabr kunlari Koreya Respublikasiga davlat tashrifi o'zaro munosabatlarni sifat jihatdan yangi bosqichga ko'tardi.

Mazkur tarixiy tashrif ko'p qirrali aloqalarni rivojlantirish uchun mustahkam zamin yaratdi. Tashrif doirasida davlatlararo, hukumatlararo va idoralararo 20 dan ortiq bitim, shuningdek, umumiy qiymati 10 milliard AQSh dollaridan ziyod bo'lgan 64 ta hujjat imzolandi.

Koreya Respublikasi Prezidentining O'zbekistonga davlat tashrifi O'zbekiston – Janubiy Koreya munosabatlari tarixidagi muhim voqea sifatida mamlakatlarimiz va xalqlarimizni yanada yaqinlashtirishga xizmat qiladi.

Tashrifning asosiy voqealari 19-aprel kuni Ko'ksaroy qarorgohida bo'lib o'tdi.

Rasmiy kutib olish marosimidan so'ng Prezidentlar Shavkat Mirziyoev va Mun Chje In tor doirada uchrashuv o'tkazdi.

Davlatimiz rahbari oliy martabali mehmonni qutlab, bu uzoq kutilgan va muhim tashrif ekanini alohida ta'kidladi.

– Janubiy Koreya O'zbekistonning ishonchli va ustuvor sherigi. Men 2017 yilgi uchrashuvimizni mamnuniyat bilan eslayman. Muzokaralarimiz samimiy va konstruktiv

ruhda o'tgan, salmoqli hujjatlar imzolangan edi. Bu keyingi yillardagi hamkorlik rivojiga asos bo'ldi. Sizning ushbu tashrifingiz davlatlararo munosabatlarimizga yangi sur'at bag'ishlaydi, – dedi Shavkat Mirziyoev.

Koreya Respublikasi Prezidenti taklif uchun minnatdorlik bildirib, O'zbekiston – Janubiy Koreya munosabatlari o'zaro do'stlik va hamkorlik ruhida izchil rivojlanayotganini qayd etdi.

– O'zbekiston qadimiy va boy tarixga ega, Buyuk ipak yo'lining markazi bo'lgan o'lka. Bugungi kunda mamlakatingiz o'z taraqqiyotining yangi davriga qadam qo'ymoqda. O'zbekistonni Janubiy Koreyaning savdo va investitsiyaviy aloqalarni faollashtirishga qaratilgan "Yangi shimoliy siyosat"ida muhim o'rin tutuvchi sherik deb bilamiz. Sizning Seulga tashrifingiz chog'ida mamlakatlarimiz o'rtasidagi strategik sheriklikni mustahkamlashga erishgan edik. Bu safar uni alohida strategik darajaga ko'tarish niyatidamiz, – dedi Mun Chje In.

O'zbekiston kuchli iqtisodiy, industrial va intellektual salohiyatga ega Koreya Respublikasi bilan hamkorlikni yanada mustahkamlashga strategik masalalardan biri sifatida qaraydi. 1992-yilda mamlakatlarimiz o'rtasida diplomatik munosabatlar o'rnatilgandan so'ng o'zaro aloqalarni rivojlantirish borasida salmoqli natijalarga erishildi.

Mamlakatlarimiz o'rtasida davlatlararo, hukumatlararo va idoralararo 170 dan ortiq hujjat qabul qilingan. Mazkur salmoqli huquqiy baza o'zaro hamkorlikning mustahkam poydevori bo'lib xizmat qilmoqda. 2006 yilda imzolangan Strategik sheriklik to'g'risidagi qo'shma deklaratsiya, 2017 yilda qabul qilingan Strategik sheriklik munosabatlarini har tomonlama chuqurlashtirish to'g'risida Qo'shma bayonot tomonlarning hamkorlikka sodiqligi, do'stligi va o'zaro ishonchidan dalolatdir.

Mamlakatlarimiz BMT va boshqa xalqaro tashkilotlar doirasida bir-birini qo'llab-quvvatlab kelmoqda. O'zbekiston Koreya Respublikasining global xavfsizlikni ta'minlash borasida katta ahamiyatga ega bo'lgan, Koreya yarim orolidagi o'zaro hamjihatlikni mustahkamlashga yo'naltirilgan tinchliksevar siyosatini ma'qullaydi.

O'z navbatida, Koreya Respublikasi 2018-yilda O'zbekiston tashabbusi bilan BMT Bosh Assambleyasi tomonidan qabul qilingan "Markaziy Osiyo mintaqasida tinchlik, barqarorlik va izchil taraqqiyotni ta'minlash bo'yicha mintaqaviy va xalqaro hamkorlikni mustahkamlash" hamda "Ma'rifat va diniy bag'rikenglik" rezolyutsiyalarini qo'llab-quvvatladi.

Parlamentlararo aloqalar, hukumatlar, vazirlik va idoralarning delegatsiyalar almashuvlari faollashdi, tashqi siyosat idoralari o'rtasida siyosiy maslahatlashuvlar mexanizmi samarali tus oldi.

Muzokarada mamlakatlarimiz o'rtasidagi hamkorlikni har tomonlama rivojlantirish, o'zaro manfaatli yo'nalishlarni topish, "soatlarni solishtirib olish" maqsadida siyosiy muloqot va maslahatlashuvlarni faol davom ettirish bo'yicha yakdil fikr bildirildi.

Ikki mamlakat hamkorligi, xalqlarimiz o'rtasidagi do'stlik aloqalarini kengaytirish maqsadida strategik sheriklik munosabatlarini yanada mustahkamlashga kelishib olindi.

Savdo-iqtisodiy aloqalardagi o'sish sur'atlari ijobiy baholanib, uni yanada oshirish uchun imkoniyatlar ko'pligi qayd etildi. Shu maqsadda huquqiy va institutsional infratuzilmani takomillashtirish, turli darajadagi tashriflar va ishbilarmon doiralar o'rtasidagi uchrashuvlarni ko'paytirish zarurligi ta'kidlandi.

Muloqot chog'ida tomonlarni qiziqtirgan mintaqaviy va xalqaro ahamiyatga molik masalalar yuzasidan ham fikr almashildi.

Prezidentlar muzokarani ikki mamlakat rasmiy delegatsiyalari ishtirokida davom ettirdilar. Unda savdo-iqtisodiy, investitsiyaviy, moliyaviy-texnik va madaniy-gumanitar sohalardagi amaliy hamkorlikni kengaytirish istiqbollari muhokama qilindi.

O'zbekiston Respublikasi bilan Koreya Respublikasi hamkorligi deyarli barcha jabhalarni qamrab olgan. Savdo sohasida eng ko'p qulaylik tartibi o'rnatilgan. Savdo-iqtisodiy hamkorlik bo'yicha hukumatlararo komissiya o'zaro manfaatli loyihalarni ishlab chiqish va amalga oshirishda muhim o'rin tutmoqda. Joriy yil 4 martda Toshkentda uning to'qqizinchi majlisi bo'lib o'tdi. 2018-yilda iqtisodiy masalalar bo'yicha Bosh vazir o'rinbosarlari majlisi formati ham yo'lga qo'yildi.

O'tgan yili ikki mamlakat o'rtasidagi tovar ayirboshlash hajmi 2,1 milliard dollardan oshdi.

O'zbekistonda janubiy koreyalik investorlar ishtirokida tuzilgan 660 korxona faoliyat yuritmoqda. Ularning 354 tasi to'liq xorijiy sarmoya hisobidan tashkil qilingan. Bu ikki mamlakat ishbilarmonlari o'rtasida savdo-investitsiyaviy hamkorlik rivojlanib borayotganidan darak beradi.

Yurtimizda ushbu mamlakatning 75 ta kompaniyasi ro'yxatdan o'tgan. 2018- yilda Incheon shahrida "O'zbekiston – Koreya savdo uyi" ochildi. U O'zbekistonning dunyo standartlariga mos mahsulotlarini Janubiy Koreya bozoriga yetkazib berishda muhim rol o'ynamoqda.

Janubiy Koreya O'zbekistonda iqtisodiyotni liberallashtirish va investitsiya muhitini yaxshilash bo'yicha amalga oshirilayotgan islohotlarni olqishladi. Bu mamlakatimizga investitsiyalar va yuqori texnologiyalar kelishini ko'paytirib, qo'shimcha qiymatli

mahsulotlar ishlab chiqarish, doimiy ish o'rinlari yaratishga xizmat qiladi.

Prezident Shavkat Mirziyoev O'zbekiston energetika, neft-gaz, kimyo, konchilik, transport va logistika sohalarida hamkorlikni kengaytirish, mashinasozlik, elektr texnikasi, to'qimachilik va oziq-ovqat sanoati, infratuzilmani rivojlantirish bo'yicha istiqbolli loyihalarni amalga oshirishdan manfaatdor ekanini qayd etdi. Janubiy Koreya kompaniyalari mamlakatimizda o'zlarini erkin va qulay his qilishlari uchun har tomonlama qo'llab-quvvatlanishini alohida ta'kidladi.

Muzokarada mazkur sohalardagi yangi imkoniyatlar, ularni hayotga tatbiq etish bo'yicha takliflar ko'rib chiqildi. Iqtisodiyotning yetakchi tarmoqlari, mamlakatimizdagi erkin iqtisodiy zonalar va kichik sanoat zonalarida korxonalar tashkil etish, "elektron hukumat"ni rivojlantirish, innovatsion va ijtimoiy sohalarda bo'yicha kadrlar tayyorlashni davom ettirishga kelishib olindi.

O'zbekiston va Janubiy Koreya axborot texnologiyalari, raqamli tibbiyot, ta'lim, madaniyat sohalarida samarali hamkorlik qilib kelmoqda. Mamlakatimizning maktabgacha ta'lim tizimiga Janubiy Koreya tajribasi keng joriy etilmoqda.

O'zbek va koreys xalqlarining dunyoqarashi va urf-odatlarini o'xshash. Mamlakatlarimiz eng qiyin davrlarda bir-birini qo'llagan. Bugun O'zbekistonda yashayotgan 180 mingdan ziyod koreys diasporasi ko'p millatli jamiyatimizning ajralmas qismiga aylangan. Koreys madaniyat markazlari uyushmasi, viloyatlarda uning bo'linmalari faoliyat yuritmoqda. Uyushma yurtimizda va xorijda koreys tili, madaniyati, urf-odat va an'analarini saqlash va rivojlantirish bo'yicha faol ish olib bormoqda.

2017-yili O'zbekistonda koreys millati vakillari yashayotganining 80 yilligi munosabati bilan poytaxtimizdagi "Do'stlik" bog'ida yodgorlik monumenti ochildi. Poytaxtimizning markaziy ko'chalaridan biriga Seul nomi berildi. Koreys xalqining ma'naviy-madaniy merosini saqlash va rivojlantirish maqsadida Koreya Respublikasi hukumati tomonidan Toshkent shahrida Koreya madaniyati uyi qurib bitkazildi. Ushbu maskan xalqlarimiz abadiy do'stligining yana bir yorqin timsoli bo'ladi.

Mamlakatimiz oliy o'quv yurtlari Janubiy Koreyadagi 45 dan ortiq ilmiy-tadqiqot muassasasi bilan hamkorlik o'rnatgan. Poytaxtimizda Koreya Respublikasining to'rtta universiteti filiali ochildi.

Tibbiyot sohasi ham hamkorlikning muhim yo'nalishlaridan. Koreya xalqaro hamkorlik agentligi (KOICA)ning moliyaviy-texnik ko'magida o'zbekistonlik mutaxassislar Janubiy Koreyadagi yetakchi klinika va markazlarda malaka oshirmoqda, koreyalik shifokorlar tomonidan mamlakatimiz aholisi beg'araz asosda tibbiy ko'rikdan o'tkazilmoqda.

Davlatimiz rahbari O'zbekiston mazkur sohalardagi hamkorlikni yanada kengaytirishdan manfaatdor ekanini ta'kidladi. Janubiy Koreya Prezidenti ilg'or tajribalardan foydalanish va kadrlar malakasini oshirishga hissa qo'shishga tayyor ekanini bildirdi.

Samarali muzokaralardan so'ng ikki tomonlama hujjatlarni imzolash marosimi bo'ldi.

Prezident Shavkat Mirziyoev va Prezident Mun Chje In O'zbekiston Respublikasi bilan Koreya Respublikasi o'rtasida Alohida strategik sheriklik to'g'risidagi qo'shma deklaratsiyani imzoladi.

Hukumat va vazirliklar o'rtasida investitsiyalarni rag'batlantirish va o'zaro himoya qilish, erkin savdo bitimi tuzishni o'rganish, tinch maqsadda fazoni tadqiq etish, fan, texnologiya va innovatsiyalar sohasida hamkorlik, sog'liqni saqlash sohasida hamkorlik bo'yicha O'zbekiston – Koreya markazini tashkil etishga oid va boshqa hujjatlar imzolandi.

Tashrif doirasida maktabgacha ta'lim, mehnat va bandlik, adliya, qishloq xo'jaligi, kapital bozorini rivojlantirish, kichik va o'rta biznes, o'simliklar karantini sohalarida, shuningdek, mamlakatlarimiz savdo-sanoat palatalari o'rtasida ikki tomonlama qator hujjatlar imzolangani qayd etildi.

Ommaviy axborot vositalari uchun o'tkazilgan brifingda Prezidentlar an'anaviy do'stlik, ochiqlik va o'zaro anglashuv ruhida kechgan muzokaralar natijalaridan mamnunligini alohida ta'kidladi.

– Muloqotlarimiz O'zbekiston bilan Janubiy Koreyaning siyosiy, savdo-iqtisodiy, investitsiyaviy, madaniy-gumanitar va boshqa sohalardagi hamkorligi xalqlarimizning uzoq muddatli manfaatlariga to'la mosligini, xalqaro va mintaqaviy muammolar, xavfsizlik va barqarorlikni ta'minlash masalalari bo'yicha pozitsiyalarimiz yaqin ekanini namoyish etdi. Bugun imzolangan Alohida strategik sheriklik to'g'risidagi qo'shma deklaratsiya davlatlarimiz o'rtasidagi munosabatlar mutlaqo yangi bosqichga ko'tarilganini ko'rsatadi, – dedi Shavkat Mirziyoev.

– Dunyoning diqqat markazida bo'lib kelayotgan O'zbekiston Prezidentiga chuqur hurmatimni bildiraman. Shavkat Mirziyoev hamma sohalardagi – siyosat, iqtisodiyot, ijtimoiy hayotga doir islohotlari bilan O'zbekistonni yangi taraqqiyot bosqichi sari yetaklamog'da. Bugun mamlakatlarimiz o'rtasidagi munosabatlarni alohida strategik sheriklik darajasiga ko'tardik. Uni hayotga tatbiq etish mexanizmlari, o'zaro hamkorlikni rivojlantirishning yangi yo'nalishlarini muhokama qilib, istiqbolli kelishuvlarga erishdik, – dedi Mun Chje In.

Kunning ikkinchi yarmida Koreya Respublikasi Prezidenti Mun Chje In O'zbekiston Respublikasi Oliy Majlisi Qonunchilik palatasiga tashrif buyurib, mamlakatimiz parlamenti

a'zolari oldida nutq so'zladi.

Koreya Respublikasi rahbari O'zbekiston Bosh vaziri Abdulla Aripov hamrohligida Mustaqillik maydoniga tashrif buyurdi. Oliy martabali mehmon hurriyatimiz, porloq istiqbolimiz va ezgu niyatlarimiz ramzi bo'lgan Mustaqillik va ezgulik monumenti poyiga gul qo'ydi.

Prezidentlar Shavkat Mirziyoev va Mun Chje In "O'zekspomarkaz"da tashkil etilgan O'zbekiston – Janubiy Koreya biznes-forumining ochilish marosimida ishtirok etdilar.

Forumda ikki mamlakat iqtisodiy va moliyaviy tuzilmalari rahbarlari, yetakchi ishbiarmonlari, xususan, Koreya Respublikasining 150 ta kompaniya va tashkilotidan 350 dan ortiq vakil qatnashdi.

Mamlakatimiz iqtisodiyotidagi Janubiy Koreya investitsiyalarining umumiy hajmi 7 milliard dollardan oshgan. Koreya milliy neft korporatsiyasi, Eksimbanki, "Kogas", "Lotte group", "Samsung", "Hyundai", "Shindong resources" va boshqa ko'plab yetakchi kompaniyalari yurtimizda yirik investitsiya loyihalarini amalga oshirishda faol ishtirok etmoqda.

Davlatimiz rahbari Ko'ksaroyda o'tgan muzokaralarda ishbiarmonlik aloqalarini qo'llab-quvvatlash, ayniqsa, o'rta va kichik biznesni rivojlantirishga alohida e'tibor qaratilganini ta'kidladi.

– Bugun O'zbekistonda amalga oshirilayotgan islohot va o'zgarishlar ulkan g'oya va loyihalarni hayotga dadil joriy etish uchun keng imkoniyatlar ochmoqda. O'tgan yili mamlakatimizda yangi qo'shma korxonalar soni 3 barobar ko'paydi. Biz bundan buyon ham Koreya biznesining mamlakatimizdagi ishtirokini kengaytirish uchun eng qulay sharoitlarni yaratishga tayyormiz, – dedi Shavkat Mirziyoev.

Koreya Respublikasi Prezidenti O'zbekiston azaldan savdo, ilm-fan, madaniyat markazi bo'lgani, bugungi kunda ham biznes uchun keng imkoniyatlar ochilayotganini qayd etdi. Janubiy Koreya O'zbekistondagi investitsiyaviy loyihalarni qo'llab-quvvatlash, ilg'or tajribalar bilan o'rtoqlashishga tayyor ekanini bildirdi.

Biznes-forumda ikki mamlakat kompaniya va tashkilotlari o'rtasidagi investitsiyaviy hamkorlikni kengaytirish, yangi loyihalarni ishlab chiqish va amalga oshirish, tovarlar yetkazib berish va xizmat ko'rsatish masalalari muhokama qilindi. Umumiy qiymati 12 milliard dollardan ziyod bo'lgan bitim va kelishuvlarga erishilgani qayd etildi. Ular energetika, neft-gaz, kimyo, tog'-kon, mashinasozlik va elektr texnikasi, transport va logistika, to'qimachilik va oziq-ovqat sanoati, infratuzilmalar, axborot-kommunikatsiya texnologiyalari, raqamli tibbiyot kabi ustuvor yo'nalishlarni qamrab olgan.

"Angren" erkin iqtisodiy zonasini "Inchxon" erkin iqtisodiy zonasi boshqaruviga berish, "Bo'stonliq-farm" hududida eng zarur dori vositalari ishlab chiqarish bo'yicha kelishuvlar alohida e'tiborlidir.

Davlatimiz rahbari Janubiy Koreya ishbilarmonlarini mamlakatimiz iqtisodiyotidagi yangi imkoniyatlardan faol foydalanishga chaqirdi.

O'zbekiston Respublikasi Prezidenti Shavkat Mirziyoev va Koreya Respublikasi Prezidenti Mun Chje In rafigalari bilan birga ikki mamlakat san'at ustalarining kontsert dasturida ishtirok etdi.

Oliy martabali mehmon sharafiga tashkil etilgan ushbu kontsertda yurtimiz san'atkorlari, koreys madaniyat markazi a'zolari va Janubiy Koreyadan kelgan ijodiy guruhlar qatnashdi.

Kontsertda o'zbek va koreys milliy kuy-qo'shiqlari ijro etildi. Ularda xalqlarimiz o'rtasidagi do'stlik, madaniy hamkorlik yana bir bor namoyon bo'ldi.

Koreya Respublikasi Prezidenti Mun Chje Inning mamlakatimizga davlat tashrifi davom etmoqda.

O'ZA